

عاطف افندی کتبخانه سی

نشر و تندن

عدد

۳

فرنك مقلد لکی

و

شایقه


محرری: فاتح درسما ملرندن اسکایی

محمد عاطف

صاتیس محلی: بایزبدده حکاکارده (۴۷) نومرولی دکان

استانبول — مطبعه « قدر »

۱۳۴۰



فرنك مقلد لكي وشاقه



الحمد لله الذي اباح لعباده الزينة واحب ان يرى عليهم آثار النعمة
والصلوة والسلام على سيدنا محمد الذي نهى امته عن التشبه بالملل الغير
الاسلامية وعلى آله واصحابه الذين اجتنبوا عن تقليد الفسقة والفجرة

[تقليد]

مقلد : تقليد ايدن ديمكدر .

تقليد : حسن ظن ايدوب محقق اولديقني اعتقاد ايتك سبيله بر
كيمسهييه اعتقاده ، قوله ، فعلده ، صورت وسيرته بلا دليل اتباع
واقتدا ايتك وآ كا بكزده مك ديمكدر .

شرع شريف نظرنده على الاطلاق تقليد جائز دكدر . از جهله
مجرد نظر واستدلال ايله وقوف ممكن اولان اصول اعتقادييه واساسات
اسلاميه ده معجزات ايله مؤيد اولان رسول ذیشان (صلى الله عليه
وسلم) اقدمزدهن بشقه هيچ بر كيمسهييه تقليد جائز دكدر . بوبابده
هر فرد اجمالاً ويا تفصيلاً مستبدل اولق لازم وواجبدر . بناء عليه
استدلال قدرتي اكتساب ايتيمان كناهكار اولور .

فقط امور عباد ، معطل اولمه مق ايچون يالكز فروع شرعيه ده

یعنی عبادات و معاملاتده درجهٔ اجتهاده واصل اولیانلرک مجتهدلره تقلیدی ، ضرورتاً مشروع قیلنمشدر .

شوقدرکه امردینده معتمد علیه اولان نصوص شرعییه مخالف اولان خصوصاًتده (لاطاعة لمخلوق فی معصية الخالق) = خالقه معصیت اوله حق ایشده مخلوقه اطاعت اولنماز) حدیث شریفی مقتضای منیفمنجه نه پر مجتهدک ، عالمک ، شیخک ، فقه خلفاء ، امرا ، حکما ، فلاسفه نک اعتقاداته ، عبادات و معاملاتده ، اخلاق و آداب دائر سسوزلرینه ، فعللرینه ، اتباع ، انقیاد ، تقلید و تشبه قطعاً جائز دکلدر . خلاصهٔ کلام بدعت قبیحهده ، منکرات و مناهیده و شرع شریفه مخالف اولان اصول و معاشرات مدینتده هیچ بر کیمسهیه تقلید اصلاً جائز دکل ، نروده قالدیکه شعار کفرده ملل غیرمسلمهیه تقلید جائز اولسون بوقطعاً جائز اولماز .

شو حالده برمسلمک شعار و علامت کفر عد اولنان بر شیشی بلا ضرورت کینمک و یا طاقینمق صورتیله غیر مسلملره تقلیدی و کندیسی آنلره بکزه تمسی شرعاً منهی ممنوعدر . بوخصوصه اجماع امتده انعقاد ایلشدر . بونده شک و شبهه یوقدر . زیرا رسول ذیشان (صلی الله علیه و سلم) اقد صریحاً یورمشاردرکه (من تشبه بقوم فهو منهم) بر قومه بکزه مکک چالیشانلر او قومدنذر) (امام احمد و ابوداود) تشبه : بشقه لرینک ایشلدیکی برایشی اونلره تبعاً ایشله مک دیمکدر . شو حالده حدیث شریفک معناسی : بر قومه بکزه مکک اوزننلر بکزه مکک ایسته نیان قدر مشترکده اونلردنذر ، او قدر مشترک کفر ایسه کفرده ، معصیت ایسه معصیتده ، صلاح حال ایسه صلاحده ، بونلرک شماردی

ایسه شعارده او قومك حكمنه تابع اولورلر ديمكدر . بناء عليه :
 بو حديث شريف اهل كفر وارباب فسقه بكنزه بشدن نهی
 و ترهیبی متضمن اولدینی کی اصحاب صلاحه بكنزه مكلكه تشویق
 و ترغیبی ده محتویدر . چونكه حديث شریفده (قوم) لفظی مُسَكِر
 اولدیفندن هم صلاحیه ، هم غیرلرینه شاملدر . نبی معظم (صلی الله
 علیه وسلم) افندیز دیگر بر حديث شریفده بیورمشاردرکه (لیس
 منامن کَشَبه بغیرنا = بزدن بشقه لرینه بكنزه مككه اوزه نلر بزدن ،
 بزم ملتزمذن دكلدر) (الجوامع الصغیر)

بو حديث شريف منطوقی اعتباریه شعارلرنده ملله غیرمسلمه یه
 تشبهن ترهیبی متضمن اولدینی کی صورت و سیرت لرنده صلاحای
 مسلمینه تشبیه ترغیبی ده مشعردر .

شو حالده بو حديث شريفك مقتضای طالبینجه اهل اسلام
 طریق و شعار کفر و علامت بدعت قبیحه عداولتان شیلرده اهل کفره
 و بدعت قبیحه اربابنه تشبهن منع و نهی اولنمشدر .

اساساً دین اسلامده کفر و معصیت منهی اولدینی کی شعار کفر
 و شعار معصیت ده منهی در .

اهل کفر وارباب معصینه طریق و شعارلرنده تشبیه ایسه اکثریا
 یا کفره و یا معصیتیه و یا ایکینسه ذریعه اولدینی ایچون شریعت احمدیه ده
 منع اولونوب حرام قیلنمشدر . واقعا ایلک هجرت نبویه زمانلرنده
 یهودیلر نه شعارده ، نه لباسده ، نه ده بشقه بر علامت مخصوصده
 مسلمانلردن تمیز ایتمزلردی ، رسالتناه افندهنك بو خصوصده سکوت
 بیورملری بو حالک شروعیتهی کوستره گده ایدی . فقط بالآخره بو

حکم فسخ اولئوب شعار و طریقته غیر مسلملردن مفارقت مشروع
قلنمشدر. بونک سینه کلنجه هجرت نبویه نك ایلک زمانلرنده مسلمانلر
ضعیف اولدقلرندن غیر مسلملاره مخالفت هنوز مشروع قیلنمه مس
ایدی بالاخره دین مبین اسلام ادیان سائره یه غلبه ایلئوبده اهل
اسلام کفار ایله جهاده و آنلره جزیه وضعنه کسب قوت ایلینجه
طریقت و شمارده اولردن مفارقت مشروع قیلنمشدر .

دیمک اولئورکه هر عصرده ، هر بلده ده مال غیر مسلملر
طریق و شعاری هر نه طرزده اولورسه اولسون اهل اسلام بلاضروره
او طریق و او شمارده کندیله یی آنلره بکنزه تمکدن و آنلرک اطوار
وعاداتنه اویمتدن منع اولنمشدر . نته کیم (من احدث فی امرنا هذا
مالیس منه فهورد = هر کیم بزم شو ایشیمزده ، یعنی دیخزده آندن اولمیان
برشی احدث ایدرسه اوشی مردوددر) حدیث شریفله اصول
وبراهین دینه یه مستند اولیه رق رأی مجرد ایله امور دینه ده
زیاده و یا نقصان قیلحق صورتیه یکی برشی احدث ایتمکدن ، بر بدعت
وجوده کتیرمکدن منع اولنمشدر .

یوقسه کرک اهل سنت و ارباب ضلال و کرک اهل کفر طرفندن
احداث و ایجاد اولتان هر بدعتدن و هر یکی بایلمن شیلاردن و اهل
کفر ایله ارباب ضلاله مطلقا مشابعتدن نهی و منع اولنمش دکلدده زیرا
اویو حق ، یاتحق ، اوتورمق ، یمک ، ایچمک کی امور طبیعه ده
مشابعت ضروریدر . بوندن باشقه آلات زراعت ، ادوات صناعت ،
وسائط حرب ، یاتاق و مطبخ طاقی کی ، امر دیندن اولئوبده
کندیله یی یالکنز غرض دنیوی مقصود اولان امور مباحه یی احدث

م شروع و حتی بونلردن بمضیلری مأمور بهدر . بناءً علیه بدعت عادیه
نوعندن اولان بوکی امورده ملل غیر مسلمیه تقلید و بو خصوصده
آنره مشابعت منهی و ممنوع دکلدر .

[دین اسلام نظرند مدیت فربه نك مشروع اولان
واولیان جهتلی]

بو بحثه شروع ایتزدن اول شوقی عرض ایده یکه : مدیت
فربه ، مادی و معنوی ایکی جهتی حاز اولدینی کی بونلردن هر
بری بشریته نافع ویا مضر اولق اوزره ایکیشر قسمی حاویدر .
حالبوکه دین اسلام بشرک روحانی و جسمانی غذا و تکاملی کافل
اولان بتون فضائل و کالاتی امر ایلوب بونی اخلال ایلن ردائل
و قباحی منهی و منع ایدر . بو نقطه نظرندن فطرت بشره الی موافق بر
دین اولدیفندن دین اسلامه دین فطرت تسمیه اولمشدر . بو اصل
واساسدن طولانی درکه :

دین جلیل اسلام (من سن فی الاسلام سنة حسنة فله اجرها
واجر من عمل بها من بعده من غیر ان یتقص من اجورهم شیء)
بر کیمسه دین اسلامه موافق بر طرزده بین المسلمین بر طریق فضیلت
ایجاد و کوزل بر شی اختراع ایدرسه اونک اجرله قیامته قدر اوشی
ایله عامل اولانلرک اجر و ثوابنک برر مثلی او کیمسه عائد اولور .
آندن صکره اوشی ایله عمل ایدنلرک کندی حصه لرینه دوشن اجر
و ثوابدن هیچ برشی نقصان قیلماز) و (اتم اعلم باس دنیا کم
حقنده بیان شرعی وارد اولیان دنیا ایشلری سز دعا این بیایر سیکز) .
حدیث شریفلی ایله امور دنیادن دیکیش ایکته سندن طو توب ده

دمیر یوللرینه ، طوپلرہ ، زرہیلرہ ، طیاردلرہ ، وسائلط مخابرہ یہ ،
بری وبجری تجارتہ، صنایع مختلفہ یہ، استعمار ارضہ، فابریقہلرہ، آلات
زراعت وادوات صناعتہ وهر عصرہ کورہ ارکان واسباب جہادہ
وارینجہ یہ قدر مدینتک مادیات قسمندن بشریتہ نافع اولان امور
مباحہ وحسنہ یی احداث واختراعہ مساعدہ بیورمشدر . وحقی
طَلَبُ الْکَسْبِ فَرِیضَةُ عَلٰی کُلِّ مُسْلِمٍ وَمُسْلِمَةٍ (حدیث
شریفہ ناسہ محتاج اولیہ جق درجہده حالندن مال قرانقلنی هر
مسلم ومسلمہ یہ فرض قیلہرق امر معیشتہ بشقہلرینہ یوک اولیوب
هرکسک مساعی ذاتیہ سی ایله کچیمکی مسلك ایدینسنی امر ایتمش
و) (وَاعِدُوا لَهُمْ اٰمَّا اسْتَطَعْتُمْ مِنْ قُوَّةٍ) نظم جلیلی ایله عصرینہ
کورہ دشمنی ترہیب ایدہ جک درجہ آلات واسباب جہادک اعداد
واحضار اولنسنی فرض قیلمش و) (طَلَبُ الْعِلْمِ فَرِیضَةُ عَلٰی کُلِّ مُسْلِمٍ
ومسلمہ) حدیث شریفی ایله ده علوم دینہ دن تصحیح اعتقاد، تہذیب
اخلاق ، اصلاح اعمال ایدہ جک قدر اوکرہ نمکی هر مسلم ومسلمہ یہ
فرض عین قیلدقدن بشقہ بقای ابدانہ ، ادامہ حیاتہ و بین الناس معاملاتہ
دائر محتاج اولنان فنون وصنایعدن بشقہ قوم وملتہرہ احتیاجدن
مستغنی اولنہ جق درجہده اوکرہ نمکی مسلمانیلرہ فرض کفایہ قیلمشدر .
شو حالده آنلردن برطائقہ، علوم وصنایعدن بودر جہسنی اوکرہ نمزلرسہ
کافہ سی کناہکار اولوب دنیا و آخرتہ بوقصورلرینک جزا و ضررلرینی
چکرلر . دین مبین اسلام اقسام مدینندن استعمار ارض، علوم ، فنون
وصنایع کبی امور نافعہ یی امر ایدوب بشقہ اقوامہ احتیاجدن اغنا

ایده جك درجه سنی او كره نمكي مسلمانلره فرض قیلمش اولدینی ایچوندركه مدنیت اسلامیة ادوار عالیہ سنده عزایای ممتازہ بی جامع صنایع بدیعہ اختراع ایلشدرد. اوروپا مشاہیر اجتماع یونندن (کوستا و لوبون) ك بعض آثاریلہ کتب توار یخندن مستفاد اولدینی اوزره مدنیتك سائر عناصر اساسیہ سی کبی صنایع ده آتی ویا بدی بیک سنہ اول (دین سباوینك مهد ظہوری اولان) آسیا قاطعہ سنده آنور سککنہ سی طرفندن اختراع اولونوب بالاخرہ مصرہ نقل اولمشدرد. قرون اولی ده کی یونان صناعاتی دجلہ ونیل سواحیلندہ اختراع اولونان صناعاتدن دو غمشدرد.

دین جلیل اسلامك ظہوریلہ شمشعہ دار بر مدنیت فاصلہ اسلامیہ تأسس ایدنجہ مسلمانلر اوزمان موجود بولنان مصر و یونان صناعاتی اقتباس ایدرك آرزمان ده اصلارینہ فائق بر شکل نویسنہ افراغ ایلہ عزایای عالیہ بی محتوی صنایع بدیعہ وجودہ کثیروب مصر و یونان مدنیتہ تفوق ایتمشلدرد. آثار باقیہ اسلامیہ بو مدعاتك بر شاهد عادلیدرد.

بعض ممالك اسلامیہ بی استیلایدن سلبیونك صنایع نفیسہ اسلامیہ بی اقتباس ایلہ قسماً آوروپا یہ نقل ایتش اولملری بوگونکی غرب صناعاتك ترقی وانکشافی اسبابندن بری در. وحق ایلک اوکجه مدنیتہ قارضی ضربیلرك قلبندہ برشوق ازیانديران جاذبه، اندلس آفاقندہ لمان ایتش اولان مدنیت اسلامیہ ضیاسیدرد، اوتاریخندن اول ضربیلرك جهل، ظلمت، وحشت، مرج و صرج ایچندہ بویان اولدقلرینہ تاریخ شهادت ایتمکده در. دیمك اولیورکه اساس اعتباریلہ مدنیت غربیہ نك مولدی شرف قدر.

دین مبین اسلام مدینتک اقسام نافعہ سنہ ارشاد ایلدیکی ومدینت
اسلامیه جه وقیلہ یک مهم آثار خارقہ وجودہ کتیرلدیکی حالده
زمانمژده کی مسلمانلرک بو فضائل عالیہ دن محرومیتلرینه سبب ندر
دیہ سؤال اولنورسه جواب اوله رق دیرزکه : محروم قالدقلری
سائر خصوصاتده اولدینی کبی بوکاده سبب اوامر منیفه دینه
مقتضیاتدن بولنان سعی وعمله توسل ایتمه ملریدر . دین اسلامک
ارشاد ایلدیکی فوائد عالیہ دن استفاده آنجق اوامر واحکام حکیمانه سنه
امتنال ومقتضاسیله عمل ایتمک متوققدر ، شو حالده ادعای اسلامیتده
بولنانلرک قواعد دینیہ یی یالکز کتب واوراقده حفظ ایتملری هیچ بر فائده
تأمین ایدهمیه جکی کبی مقتضای دیانت اوزره اعصاب واعضای بدنیه لرینی
تحریرک ایتمدکجه ده مجرد اعتقاد ایله مطلوب اولان فوائد مادیہ ومعنویہ
حصولپذیر اوله ماز .

رسول معظم صلی الله علیه وسلم افندمن بر حدیث شریفده
بیورمشلردرکه (وَإِنَّ مِنَ الْعِلْمِ جَهْلًا = بعض علم جهل ایله مساویدر).
فی الحقیقه عمله مقرون اولمان علم جهل ایله مساویدر . عملسنز عالم رو
عوامدن اوزاقلاشمش اولماز منافع علمیہ دن محروم قالمق اعتباریله بویله
حاکم جاهلدن فرقی یوقدر مثلا مسکراتک حرمت ومضرتی بیلدیکی
حالده استعمال ایدن بیلیمیه رک استعمال ایلین ایله مساویدر . بلکه
اولکی ایکنجیدن ده زیادہ مستحق مذمتدر . بناءً علیه کرک ارباب
علم وکرک ارباب دین ، علم و دینک مقتضای منیفی اوزره حامل
اولماقجه بولنرک تأمین ایلدیکی فیوضات وسعاداته مظهر اوله مازلر .
معروضات سالفه دن مستبان اولدینی اوزره دین مبین اسلام ، ارکان وعناصر
مدینتک مادیات قسمندن امور نافعہ وحسنه نک احداثه مساعدہ ایدوب

مشروع قبله قد نبشقه بونلری احداث واختراع ایلمین ملتله بو خصوصانده
تقلیده ده رخصت ویرمشدرد .

فقط دین جلیل اسلام (قل انما حرم ربی الفواحش ما ظهر
منها وما بطن والانیم والبغی بغیر الحق وان کُشِرکوا بالله مالم یزل به
سلطانا وان تقولوا علی الله مالا نعلمون = جیم دیکه ربیم کیزلی
و آشکار اولان کافه فواحشی، یعنی انسابه دائر عموم جنایاتی ، منبع
ائم اولان مسکراتی یعنی عقوله حاند جنایاتی ، بقرحق بنی و ظلمی
یعنی نفوس و امواله دائر اولان جنایاتی واللهه شرک ایله آنک حقهده
بیلمدیکز شیملری سویله مکزی یعنی دیانتیه دائر ارتکاب جنایت
ایتمکزی حرام قیلدی). نظم جلیلی ایلله الحاد، ظلم، شقاوت، فحش،
ایچی، قمار، دانس، بار، تیائرو وسائر سقاقت ایلله میخانه، کارخانه،
قارخانه، دانس و بار محللری کشادی کی مدینت غریبه نیک مادیات
قسمندن اخلاقاً، اجتماعاً، اقتصاداً، ناموساً و دیناً مضر اولان امور
رذیله و قبیحه نیک کافه اصول و فروعنی حرام قیلوب منع ایلمشدرد .
بناءً علیه مدینت غریبه نیک بو کی رذیلت جهتلری غیر مشروع و عذر [*]

[*] آنک ایچون رسول معظم صلی الله علیه وسلم افندرد (من سن فی
الاسلام سنةً سیئةً فعلیه وزرها ووزر من عمل بها من بعده من غیر ان یتقص من
اوزارهم شیء = برکیمسه دین اسلامده فنا بربول احداث و چرکین برشی
اختراع ایلمرسه او فنالک وزر ووبالی ایلله قیامتیه قدر اونکله عمل ایلمرک
وزر ووبالرندی برره نلی اوکیمسه عاند اولوره آندن مسکره او فنالفی ایشله بنلرک
کندی وزر وکناهرندن هیچ برشی نقصان قیلنماز) حدیث شریفی ایلله بین
المسلمین چرکین و فنا برنی اختراعندن و برطریق رذالت احداثدن منع و ترهیب
بیورمشلردرد .

شو حالده بوبله امور رذيله و قبيحه ده افراد مسلميندن هيچ بريسنك زمانك موده سنه او عيسنه، بشقه سنه و بالخاصه ملل غير مسلميه تقليد ايلسنه، تعمير ديكر ايله ضربلا شمسنه، آوروپايلا شمسنه اسلام ساغ شرعي يوقدره. زيرامشروعيتنه دليل و برهان قائم اولميان شيارده تقليد و غيره اتباعك حرمت و بطلاننه بو آيت جليله لك قوتلي بر دليل قاطعدر. بناء عليه دين مابين اسلام كافة امور واحوال رذيله نك هم رأساً احداث و اجراسنى، هم ده بو بابده بشقه لرينه تقليد و تشبهي صورت قطعيده منع ايليوب حرام قيلمشدر.

مدنيته جهت مغنويه سنه كانجه : شريعت مطهره احمديه اوبله عالي قواعد مدنيه و اساسات اجتماعيه و اوبله اخلاق فاضله وضع و تأسيس ايلمشدر كه آوروپا او درجه تمدنه وصول ايچون دهايك جوق امكلا صرف ايتمه و حتى تماماً قواعد مقدسه اسلاميه ي قبول ايدويورمه محتاجدر. او درجه مدنيت فاضليه ارتقا ايچون بشقه دورلو يول يوقدر.

اساساً مدنيت غريبه، سعادت و تكامل بشري كافل بر مدنيت حقيقيه دكلدر. زيرا او آنجق انسانك بهيميت و جسمانيت جهتنك سعادت و تكاملنه خدمت ايدوب ملكيت و مغنويتك سعادت و تكاملنى اصلاً نظر اعتباره آليور. چونكه مدنيت غريبه حيات بشريه ي آنجق حيات فانيه دنيا دن عبارت تلقى ايلديكي ايچون بشرك يالكتر ماديت و حيوانيت جهتنك تكاملنه عطف اهميت ايدويور. بوضورتله افراد بشرده آثار بهيميتك انكشافه باعث اولوب ملكيت و حقيقي انسانيتك كمون و يابوسبتون احساسنه خدمت ايدورك سعادت سرمديه

ایصال ایلین فضائل و کالات حقیقیه دن بشری ابدیاً محروم براقیور .
وانما حیات جسمانیه و دنیا به دائر کالات بشریه نك حصولنه بر درجه به
قدر مدار اوله یلیور سده آنك مدار اولدنی احوال و اوصاف ، حیات
دنیا نك انقراضیه منقرض اولوب کیدیور . معروض زوال و انقراض اولان
احوال و اوصاف ایسه سعادت حقیقیه دن مد اولنه ماز . سعادت حقیقیه : حیات
دنیا دن صکرده دوام ایدوب بقا پذیر اولان اوصاف و کالات بشریه دن
عبارتدرکه بونک مرشدلری آنجق انبیای عظام حضراتیدر . مدنیت غریبه نك
یوکارهبر اوله بیلمسی غیر قابل امکندر .

حالبوکه مدنیت فاضله اسلامیة بشرک ملکیت و معنویت جهتنک
سعادت و تکاملنه خدمتی اصل و اساس اتخاذ ایدوب بتون اصول
و احکامی بو جهتنک انکشاف و تکاملنه خادم اولمق اوزره وضع
و تأسیس ایتشددر . شوقدرکه جمیعتک سعادت فانیه سی مقصود بالذات
دکل ، بلکه ملکیتک سعادت باقیه سی اکتسابه وسیله اولدینی ایچون
تبعاً مقصود اولغله بو مقصد اصلی بی اخلاص باعث اوله مق اوزره حد
اعتدالی تجاوز ایتدیلمه سی اساس اتخاذ ایدوب صورت معتدلانه ده
اذواق جسمانیه دن استفاده یولنی کشاد ایتش و بو صورتله بشری هم
سعادت فانیه به ، هم سعادت باقیه به ارشاد ایتشددر . شو حاله سعادت
باقیه و کالات حقیقیه آنجق مسلك انبیا ایصال ایدر . بناء علیه مدنیت
فاضله اسلامیة بر مدنیت حقیقیه درکه دساتیر عالیه سنه تماماً تمسک ایدملک
شرطیه هر جهتن سعادت و تکامل بشری کافل و حیات فانیه دنیا دن
صکرده بقا پذیر اولان اوصاف و کالات حقیقیه بی ضامندر . بناء علیه
سعادت حقیقیه بشریه سنن انبیایه اتباع و مدنیت فاضله اسلامیة تماماً
تمسک ایله حصول پذیر اولور .

شو حالدہ مدینت غربیہ حد ذاتندہ ناقص و تکامل حقیقی بی غفل اولد
یغندن اصول وقواعد مقدسه اسلامیہ بی و مسالک انبیائی تماماً قبول ایتدیکجه
نفس الامرده و عقول سلیمه اربابی نظرندہ مدینت حقیقیه عد
اولنه ماز .

بناء علیہ سعادت ابدیه و کالات حقیقیه بی اکتساب ایتک ایچون
اهل اسلام مدینت غربیہ یه دکل، غربیلار مدینت اسلامیہ یه محتاجدره
دیمک اولیورکه دین جلیل اسلام : مدینتک جهت ماده و جهت
معنویه سنک ملکیت و بهیمنتجه بشریت نافع و خادم اولان اقسامی
اون اوج عصر اول رأساً وضع و تأسیس ایله یوب ابنای بشری
اوشهره مستقیمه سوق و ارشاد ایشدور [*] .

[*] اساساً بین المسلمین تعالی و ترقی ایتدیرلمی مطلوب اولان مدینتک ایشته
یو نوعیدور . بالخاصه ملکتمزک احتیاجی مدینتک فضیلت قسمته در . حالبوکه
ملکتمده ترقی ایتدیریلن بو دکل، غرب مدینتک ردیلت و مضر قسمیدور . چونکه
ایچه بر زماندن بری ملکتمزده ، مفرط غرب مقلدی بر سر ذمه قلیله مدینت
حریت ، ملت نامنه غیر مشروع و مضر جهتلردن مثلاً ~~سویت~~ ، فحشاء ،
ایچکینک ، دانسک ، اخلاقسزلتک ، دینسزلیکک تعیم و توسیعندن باشلايور .
آوروپادن یوکلہ یوب کتیره بیلدکلری لوثیات ایله اخلاق فاضله اسلامیہ بی
تخریبه ، افکار ملتی تاویشه چالیشیورلر . اولاد وطنک قلبی بیانچی روح ،
بیانچی تربیه ، بیانچی اعتیاد ایله آشلایورلر آشلایورلده اوزرلرنده
تمرکز ایتش اولان روح اسلامیت و تورکلکی سوکوب آتفه اوغراشیورلر . بو
صورتله موجودیت ملیه مزک استنادکاهی اولان نملار ییقیلوب دوویور .
بوضالات عظیمه نکه تعیمی هم اسلامیت ، هم تورکلک ایچون باعث تلف اولسه کر کدر
مدینت غربیہ نکه ردیلت قسمی ملکتمزده کوندن کونه مظهر ترقی اولور و بو اوغورده

مدینتک ملکیت و بهیمیتجه بشریته مضر اولان اقسامی ده افراد بشری درکته بهیمیته تردی و انحطاطدن تخلص ایچون منع ایلیوب بو خصوصاتک ارتکابی و بو باده بشقه لریته تقلید و تشبیه صورت قطعیه ده. حرام قیلمشدر . شو حالده آوروپانک شائبه سفاهت ورنک ملیتدن عاری وبتون انسانیتک تکاملات مادیه سنه خادم اولان علوم، فنون و صناعاتنک، آلات و ادواتنک جمله سنی اخذ و تلقی و بو خصوصاتده آنلری تقلید مشروع و مرغویدر .

فقط میخانه ، کارخانه ، دانس ، بار ، تیاترو و سائر مؤسسات سفلیه و ترقیات سفیهانه کبی هویت دینه و اخلاق فاضله اسلامیته نک عمو وازاله سنه باعث اولان اعتقادات باطله ، اخلاق قبیحه ، اعتیادات رذیله ، افعال و اعمال مذمومه سنی اخذ و تلقی و بو خصوصاتده آنلری تقلید غیر مشروع و منقوردر .

دین اسلام ایشسته بو نوع مدینت سفیهانه نک ترقیسنه مانعدر . چونکه دین مبین اسلام بین البشر جریان ایلین امور قبیحه و اعتیادات رذیله نک کافه سنی هدم و منع ایچون وضع و تأسیس اولنمشدر . آنک ایچون اسلامیت مدینت غربیه نک بو قسمی ایله اصلاً اجتماع ایده عز . قلبلری غرب لویاتیله صبغه لائش اولانلر بو نقطه نظر دن دین اسلامی

عظیم مقدارده ثروت ملیه صرف اولنور . فقط مشروع و کمال شدتله محتاج اولنان جهتله مثلاً البسه لک اعمالی ایچون برفا بقیه به هیچ برشی صرف ایستدیک کورلیور . دیکن اولبورکه آثار خارجیه لرینه نظر آ مدینت غربیه صراحتاً کندده بولنانلر بو پرده آلتنده منافع شخصیه لرینی تأمین و آرزوی شهوانیه لرینی تطمین غایه سنی استمداف ایدوب منافع عمومی و فوائدعالیه ملیه بی اصلانظر اعتباره آلیور لرویا آله میورلر . ادعا ایستکری قوللری افعال مشهوره لری تکذیب ایتمکدن خالی قالیور .

مانع ترقی کوریوورلر. اوت بوده مدیندن معدود ایسه دین اسلام بو
کبی مدینک ترقیسنه یکانه مانع عظیمدر. اساساً سفاهت و رذالتی منع
ونهی ایلک دین اسلامک خواص مجیزه سندندر. عقل سلیم ده بونی آمردر.
آنک ایچون آوروپالیردن عقل سلیم اربابنک مملکتلرنده تعیم ایتمکده
اولان سفاهت و رذالتک منعه چالیشدقلری مسموع اولمقدهدر. ازجمله
انکلتزده حیاسزلقله مجادله ایتک اوزره (میسترووب آیوب) اسمنده
بر انکلیز (نزاہت جمعیتی) نامبله یکی بر جمعیت اخلاقیه تأسیس ایتمشدر.
جمعیت ایلک اجرا آت اولق اوزره اخلاق عمومیه بی افساده باعث
اولان قارت پوستالارک فروختنی منع ایتدیرمک ایچون حکومتیه صراحته
قرار ویردیکی غنزه لرده کورولمشدر. جمعیت اقوامده اخلاق عمومیه بی
افساده باعث اولان آجیق رسملر ایله آجیق یازیلرک منی ایچون
دولتلره تبلیغاتده بولمشدر.

(توکیو) ده مأمورین محلیه طرفندن اخلاق عمومیه بی افساد
ایتدیکی سبب کوستویله رک بوتون عصری دانشلر منع اولمشدر.
اساساً آوروپاده سوزلرینه اعتماد اولنان هکیملر ایله اجتماعیات
علملری دانشک مضرتلرینی دلائل مقنعه ایله میدان قویتمشلردر:
ازجمله دانشک مضرتلرینی اثبات ایچون دییورلرک: یقیناً ثبوت
بولمشدرک: دانش فردلرک سجه سنی، اخلاقی، و سختی تخریب
ابدوب مسلط اولدینی جمعیتلرک معنوی بنیه سنی کمرد کدنبشقه فحشی
آرتدیروب مناسکاتی آزالته رق نفوس بحرانی دنیلن فلاکتی احداث
ایتمک صورتیله ملتک ماده انعطاف سنی تعجیل ایدیور.

غرب متفکرلرینک، عقل سلیم اربابنک، دانش، ایچکی کبی غربک

مدنیت کسوه سی آئنده بین البشر تعمیم ایله مکده اولدینی رذائلی تقبیح
ایتمکده بولندقلرینه شاهد اولوق اوزه معروف مسکرات دشمنی آمریقائی
مستر (ویلیام ژونسون) ک ۱۹۱۰ یاول ۳۰ تاریخده استانبولده بولندینی
زمان مسکرات عاینده غزته جیلره واقع بیاناتی اراؤه وبو مقامه قید
ایتمک ایسترم : مومی الیه دییورکه : مسکرات ممنوعیتی فکری، غرب
مفکرمه سنک محصولی دکلدرد. بو فکر، اساس اعتباریله تمامیه شرقلیدره
مسلمانلق اون اوج عصر مقدم صورت قطعیده مسکراتی منع
ایتمشدر . بناء علیه آمریقانک کشفندن بر چوق عصر مقدم شرقده
ممنوعیت فکری تملله شمش ایدی. بو کون ایسه اسلام دینک تلقین
وتعلم ایتدیکی مسکرات ممنوعیتی آمریقانک قوانین اساسیه سنه کیرمش
بولتیور .

حالبوکه : تام بز مسلمانلقک آمریایه عامل اولوب مسکراتی منعه
قالقشدیفمز زمان نه غربیدرکه سنز، بزم مذموم کوژدیکمز برشیئی
تقلیده یلته نیورسکیز . غرب، شرقک بر فضیلتی قبوله اوغراشیرکن
سنز غربک بر رذیلتی تقلید ایدیورسکیز بو، سنزک لهکزده بر شی
دکلدرد .

آمریقالمینک بوسوزلری غربک رذائلی تقلیده جالیشان شرقلیلر
ایچون بلیخ بردرس عبرت تشکیل ایدرد. بوندن عبرت آلمه مق، متأثر
اولمه مق ایچون انسانک درکه بهیمته تردی ایدوب شعوردن محروم
اولماسی اقتضا ایدرد .

بورایه قدر عرض اولنان تفصیلاتدن شعار و علامت کفرده ملل
غیر مسلمه یه تقلید وتشبهک شرعاً حرام اولدینی آکلاشیلمشدر .

موجب کفر اولوب اولماسنه کنججه: بو خصوصده بین العلماء اختلاف اولمشدر. فقط بو مسئله نك حلی ایمان ایله کفرک حقیقتی معرفته متوقف اولدینی ایچون مقصده شروع ایتمزدن اول برازده آندن بحث ایتمک ایسترم.

(ایمان و کفر)

ایمان: رسول اکرم (صلی الله علیه وسلم) افندمزدن الله تعالی طرفندن کتیروب خبر و یردیکی ضروره و یقیناً بیاین اصول دینه واحکام اسلامیة نك حق و طوعری اولدیغه قلباً صورت جازماته اینانوب قبول ایتمک و لساناً آنی اقرار ایلمکدر.

کفر: دین اسلامدن اولدینی ضروره و یقیناً بیاین اصول واحکام کافه سی و یا آندن برینی قبول ایتمیوب انکار ایتمک و یا انکاره دلالت ایلمک بر ایش ایشله مک دیمکدر.

اساساً رسول ذیشان (صلی الله علیه وسلم) افندمزدن نقل اولنه کان اصول اسلامیة واحکام شرعیه صحت نقل اعتباریله اوچ قسمه آیریلشدر.

برنجی قسم: نبی محترم (صلی الله علیه وسلم) افندمزدن تواتراً منقول اولوب دیندن اولدینی عوام و خواصجه یعنی عموم مسلمانلرجه یقیناً و بالبداهه معلوم اولان اصول واحکام اسلامیة در: خالق تعالی حضرتلرینک وجودی، وحدانی، صفات جلیله سی ایله ملکک، کتب سماویه نك، پیغمبرلرک، قضا و قدر الهمینک، یوم آخرتک، بعث بعدالموتک، جنت و جهنمک حقیقی، طلمک حدوتی، کلمه شهادتک،

نمازك ، زكاتك ، اوروجك ، هجك فرضي ، زنانك ، لواطهك ،
خنزيرايينك ، بغير حق آدم اولدورمهك وسائر انواع ظلمك
حرمتي كي .

دين محمددين اولديني تواتر آنقل اولنوب يقيناً ثابت اولان بونوع
احكامه اصول اسلاميه و ضروريات دينيه دينوركه : بر انسان مسلمان
اولق ايجون بهمه حال بونارك كافه سني تصديق وقبول ايتك لازم
وواجبدر .

ايمانك ركن اصليسي اولان تصديقدن صكره اصول واحكام
مذكوره يني مجملأ جامع بولنان (اشهد ان لا اله الا الله واشهد ان محمداً
عبده ورسوله) دن عبارت اولان كله شهادتي سويلك ، ايمانك شرط
ويا ركنندن معدوددر . بناءً عليه اصول واحكام المذكوره نك كافه سنه
ويا آندن بعضيسنه ايناميوب دهود وانكار ايتك ويا انكاره دلالت
ايلين بر فعلده بولمق كفر وبوني ارتكاب ايدنلر كافردر .

ايكنجي قسم : رسول ذیشان (صلى الله عليه وسلم) اقدمزك
دينندن اولديني يقيناً دكل ، آنجق استدلال واجتهاد صورتيله بيلين
مسائل دينيه در : الله تعالى نك مرثي اولوب اولماسي مثلي يقيناً معلوم
اوليوب آنجق دليل ايله بيلين مسائل كي .

بونوع احكام ومسائل دينيه يني قبول ورد ، اقرار وانكار ، ايمان
ايله كفر ، ماهيتنده داخل دكلدر . بناءً عليه احكام اجتهاديه نك منكري
كافر اولماز . شوقدركه طريق شهرتله نقل اولنان احكام ومسائل
دينيه ، ماهيت ايمانده داخل اولماديغندن ردوانكاري كفر دكلسده
موجب ضالدر .

اوچنچي قسم : دين محمدیدن اولديني آنحق خير واحد ايله بيلين مسائل درکه ايمان ايله كفر بو نوع مسئله توقف ايتمز . زیرا شرائط صحفی حائز اولان خبر واحد ، باب اعتقاده حجت اوله باز . لکن باب عملده یعنی عبادات و معاملات دأر احکامده حجت اولور . بناءً عليه خير واحد طریقيله صحفی ثابت اولان بر مسئله دينیه رد وانکار خطادر .

عرض اولنان بواصله بش مسئله قهرع ايدر .

(۱) اصول مذ کوره اسلامیه دن برینه اينانمديني حلاله لساناً جمله سنی اقرار ايلين کيمسه الله تعالى نك نزدنده کافر در . بوکامناق دينور . نفاقي معلوم ايسه ناس عندنده دخي کافر اولور . نفاقي معلوم دکسه ظاهرده کی اقرارينه نظراً مسلمان عد اولنورق حقدنه احکام اسلامیه اجرا اولنور .

(۲) اصول اسلامیه قلباً اينانوبده ديلسز اولوق کبی برعاندردن دولابی لساناً اقرار ايدمه مين کيمسه هم الله تعالى نزدنده وهم انسانلر عندنده مؤمندر .

(۳) قلبنده بر نوع اينانمق اولمقله برابر تعنداً اقرار ايتمه مکده اصرار ايلين کيمسه هم نزد الهی ده ، همده انسانلر نظرنده بالاتفاق کافر در . چونکه آنک بو حالی قلبنده تصديق جزمی بولنمديقنه دليل وبرهاندر .

(۴) قلبنده اينانمق بولنمقله برابر اقراره قدرتی وار ايکن هر فصل ايسه عمرنده برکړه اولسون اقرار ايتمه مش اولان کيمسه علمادن بضيلرينه کوره نزد الهی ده مؤمن ، بعض علمایه کوره مؤمن دکلدرد .

(۵) بالاختیار و بلاضرورت صومه، آیه، ییلدیزه، کونش سجده و تعظیم ایتک و آنلر ایچون قربان کسمک، اهل کلیسه ایله برابر کلیسه یه کیدوب اجرای آیین ایتک، خاج طاقینمق، الله دن بشقه سنه عبادت ایتک کبی شعار کفر و اماره اشراک اولان بر فعل ارتکاب ایتک، یاخود الله تعالی پی، ملنکارینی، کتا بلرینی، پیغمبرلرینی، شرع شریفی، آخرتی انکار ویا بونلردن برینی تحقیر ایلک، مثلاً، مصحف شریفی چیکنه مک کبی دیلده کی اقرار ایله قلبده کی تصدیقک یالان اولدیغنه شرع شریف طرفندن علامت ظاهره قلنان بر قول ویا بر فعل کندیسندن صادر اولان کیمسه مؤمن دکلدور. زیرا او قول ایله او فعلی او کیمسه نك دیلنده کی اقرار ایله قلبنده کی تصدیقک، یالان اولدیغنه دلیل و برهاندر. آنک ایچون هر نه قدر مسلمان اسمنده اولوب اسلام دعوا سمنده بولنسه بیلر ارتکاب ایلدیکی قول و فعلی ایله پیغمبر ذیشان افندهنی تکذیب ایلدیکی جهته دین مبین اسلامک حدود و دائره سندن و اهل قبله لکدن چیقوب هم زدا الهی ده وهم اهل اسلام نظر نده کافر اولمش اولور.

علاوه اولمق اوزره شونی ده عرض ایدیم که: کفر ایکی قسم اولوب بری اصلی، دیکری عارضیدر.

کفر اصلی: اساساً ضروریات دینه دن اولان اصول و احکام اسلامییه پی قبول ایتیانلرک کفریدر. غیر مسلملرک کفری کبی.

کفر عارضی: فی الاصل دین اسلامی قبول ایتش ویا مسلمان صلبندن گلش ایکن بالاخره کندی آرزو و اختیار یله اصول اسلامییه و ضروریات دینه نك کافه سی ویا دین اسلامک یالکیز امر و جدائی

دن عبارت اولدیغنه قائل اولوب ده دنیا ایشلرینه دائر احتوا ایله یکی احکام مادیه و جسمانیه سی قبول ایتمه مک کبی ضروریات دینی دن بعضی سی رد، انکار، تکذیب و تحقیر ایلمک و یا خود شرعاً تحقیری واجب اولانلره تعظیم ایتمک صورتلریله ارتکاب کفر ایتمش اولانلرک کفریدر که بونلره صرند و مرتجع دینور. زمانزده توره یین دینسزلر بوزمره دندر. کفرک بونو عی اولکندن ده مضر ودها قنادر وحق مرتدلرک کسدگری یتز. مسلمان قادینلرایله نکاحلری حلال و مسلمان قبرستانه دفن اولنلری جائز اولماز. ارباب کفردن بوزمره سعادت دنیویه و اخرویه کبی نعم عظمایه باعث اولان دین مبین اسلامدن رجوع و خروج ایله اکا قارشو بنی و عصیان ایلمکاری ایچون توبه ایدوب تکرار دائره اسلامه طوعاً داخل اولمازلرسه دنیاده شرعاً اعدامه، آخرتده عذاب مخلده محکومدلر .

(شمار کفر)

شمار کفر: هر عصرده هر بلده ده دیکشه بیلیرسه ده ملل غیر مسلمانک کفره دائر اولان الک مشهور شعارلری شایقه، غیار، زُتار، کستیج، غسلی، صلیبدر .

شایقه : صرفده شمار کفر، یعنی غیر مسلملرک مسلمانلردن تمایزینه علامت اولان باش کسوه سیدر .

غیار : اهل ذمه مخصوص بر علامت فارقه درکه بونکله اهل اسلامدن امتیاز ایدرلردی. بعض امهات کتیده بیان اولدیغنه کوره : اوست لباسلرینک کوکسنه پرنکجه مخائف اولمق اوزره قوردهله کبی

پر پارچه دیگر لردی . فقط علامت فارقہ ہر پردہ پر دکدی . بلکہ ہر بلدہ متعارف علامت مخصوصہ واردی . مثلاً بعض بلدہ صارینگ رنگی علامت فارقہ عد اولنوردی . کوک رنگ نصاریہ ، صاری رنگ یہودیہ علامت وضع اولنش ، بیاض رنگ دہ مسلمینہ تخصیص ایدلش ایدی .

زَنار : نصارا ایله مجوسی طائفہ سنک شمار لرندن اولان برنوع قوشاقدردکے ایپکدن معمول اولوب داخله قوشانیرلر . کسُیج : طوائف مذکورہ یہ مخصوص دیگر برنوع قوشاقدردکے چارمق قالینلندن اولوب خارجدن قوشانیرلر .

عسلی : یہودی طائفہ سنک شمار لرندن اولان صاری رنگلی برخرقہ در . صلیب : خرسدیانلرکے خاج دیدکلری شیدردکے زعملرنجہ حضرت عیسانک ہیئت مصلوبہ سنک تمثالیدر .

دہا اول شابقہ ، زَنار ، غیار ، صلیب کبی اهل کفرکے شمار و علامت مخصوصہ سی اولان شیلری کینمک ، قوشانمق ، طاقینمق خصوصارینک شرعاً منہی و حرام اولدینی بیان اولنش ایدی بونک موجب کفر اولوب اولماسنہ کلنجہ : اول امر دہ شو جہتی عرض ایدہ یمک : اعمال ظاہرہ ، احوال باطنہ و روحیہ نک مظاهریدر . احوال قلبیہ آندہ انکشاف ایدر ورؤیت اولنور . بعض اعمال بشریہ واردردکے قلبدن برداعی وسائل سبیلہ انسان آکا مباشرت ایدر ، تأثیرات خارجہ دن آزادہ اولہ رق کندی حالہ قالنجہ ہمہ حال او عملی ایشلیمک مجبوریتندہ اولوب آکا ممانعت ایدہ من .

بعض اعمال بشریہ دہ واردردکے : اخوانہ موافقت ، قوتہ تبعیت ،

جلب منفعت و یا دفع مضرت که عارضی بر طاقم اسباب و عوامل خارجیہ تک تأثیریلہ مباشرت اولیور . عارضی اولان او اسباب سائقہ . زائل اولنجه عادت حالی آلمه مش ایسه انسان آندن فراغت ایدہ بیلیر . مثلاً آلمش اولدینی تربیه نتیجہ سی اولق اوزره بر قومک معنوی ایلہ صیغه لشمس واحوال روحیه سیله حالنمش اولان بر آدم زی و قیافتده ، عاداته و معاشرتده ، صورت و سیرتده او قومه تشبه و تقلیده و آنلره موافقتہ مضطر اولور . سائق ، روحی و قلبی اولدینی ایچون کندی حالته قالدیجه اوزی و عادت ، صورت و سیرتی ترکہ رضا و سماحت کوسترده من . شاید تأثیرات خارجیہ ایلہ ترکہ اجبار اولنورسه قلباً متأثر اولوب روخنده کی صیغه ازاله ایدلمدیکه او آدم بو حالدن واز کچک من . فقط بر آدمک زی و قیافتده ، عادت و سیرتده بر قومه تشبه و تقلیدی عارضی بر طاقم اسباب خارجیہ تک تأثیری ایلہ واقع اولیورسه او آدم او حالی ترک ایتکده باس کورمن و بوندن طولانی عذاب وجدانی دویماز . شو حالده شایقه ، زنا ، غیار ، صلیب که اهل کفرک شمار و علامت مخصوصه سی اولان شیلری کینمک ، قوشانق و طاقینمق خصوصنه سائق ، یارسوخ بولمش بر حالت روحیه و یا اسباب خارجیہ اولمقندن خالی دکدر . سائق ، اسباب خارجیہ اولدینی تقدیرده یل اختیار ی سلبه باعث اولور . و یا خود اولماز . بو مقامده عقلاً دهابشقه احتمال تصور اولنه ماز . سائق ، حالت روحیه ایسه ، مثلاً تربیه و اعتیاد تأثیریلہ بر آدمک روحی صیغه کفر ایلہ بو یانمق و قلبی او معنویت ایلہ اتصاف ایتک نتیجہ سی اولق اوزره الله ، رسول الله ، شریعت و سائر ضروریات دینییه ایمان و اعتقادی اولدینی ایچون سوه سوه اهل کفرک

شعار و علامت مخصوصه سی اکتسا و اتخاذ ایچش ، اولورسه ،
 او کیمسه نك کفرنده شك وشبهه یوقدر واوله ماز زیر اواعمال ظاهره .
 سنه سائق ، عین کفردر . آنك ایچون فقهایی کرام حضرائی (کفره
 نیت ایلمن کیمسه او آندن اعتباراً کافر اولور) دیورلر . وکذا
 شرع شریفده علامت کفر عد اولنان شیلری استحلال ویا حرمتی
 استخفاف ایدنلرک کفری شبهه سزدر . شعار کفرده تشبیهی استحلال
 ایتمکده بوقیلدندر . زیرا (من تشبه بغیر نافلیس منا) حدیث شریفی
 ایله شعار کفرده اهل کفره تشبیهک نهی اولندیغی عصر سعادت
 نبویه دن زمانمزه قدر تواتراً نقل اولنه کلمکده اولوب امت محمدون
 هر عصرده بولنان مجتهدین کرام حضرائی بونك حرمنه اجماع واتفاق
 ایتملشدور . بناء علیه اهل کفره شعارلرنده تشبیهک حرمتی ادله
 شرعیه دن اجماع امثله نابتدر . آنك ایچون استحلال واستخفافی
 کفردر .

شعار کفر اولان شیلری اکتسا و اتخاذ سائق ، اضطرار واکراه
 حلیجی یعنی ال ، آباء کبی اعضای بدنیه دن برینی کسمک ویا اولدورمک
 ایله تهدید و اجبار صورتیه وقرع بولورسه دفع مضرت ایچون قلبده
 ایمان و تصدیق محافظه اولندیغی حالدده آنجیق اومت ائناسنده شایقه
 وسائر کبی شعار کفری کیمکه ، اتخاذ ایدنمکه شرعاً وخصت
 ویرلملشدور . بناء علیه بویه بر حال اضطراره معروض قالان برمسلم
 شعار کفری اکتسا ایتمکله کافر اولماز .

و کذا غیر مسلملره بکزه مک قصدی اولدیغی حالدده هلاکی ایجاب
 ایدن حرارت و برودتی دفع ایتمک ضرورتندن ایچون ملل غیر

مسلمه نك قانسوه و كلاهني كينمك كفرى ايجاب ايتمز .

و كذا حريده خدعه و دشمنك اسرار و احوالنه و قوف و اطلاع و يا مسلمانلردن غير مسلملرك ضررلرينى دفع كهي عامه مسلمينك نفعنه عائد بر مقصد خيرك و بر مصلحت دينه نك استحصالى ايجون بالا اختيار شمار كفرى ا كتسا و انخاذا ايدينك موجب كفر اولماز . فقط تجارت ، تحصيل و سياحت كهي منافع خصوصيه ايجون ديار كفره كيدوبده اوراده و يا ديار اسلامده بيلهرك ، بلا ضروره و بالا اختيار شافقه و سائر شمار كفرى ا كتسا ايلين مسلم حقنده اختلاف اولمشدر . فقهاى كرامك ا كتريسى (اهل كفره مخصوص و آنلرك شعارى اولان قانسوه يعنى شافقيه بلا ضروره و بالا اختيار كينمك كفرده زيرا بوعلامت كفردر . آنك ايجون بوني انجق مجوسيت ، نصرانيت يهوديت كهي انواع كفردن برينى التزام ايدنلر و قبللري صبغه كفر ايله صبغه لشم اولانلر كييه بيليرلر . اساساً علام ظاهره ايله امور باطنيه استدلال و آنك اوزرينه حكم ايتك عقلاً و شرعاً مقبول و معتبر بر طريقدر) ديورلر .

ققهادن بعضيلرى ده (مجوسى ، نصارى و سائر ملل كفاره مخصوص و آنلرك شعارى اولان قانسوه يعنى شافقيه بالا اختيار كييهن بر مسلم آنلره تشبه و تقليد ايله يكي ايجون آثم و كناهكار اولورسده كافر اولماز) ديورلر .

ايكنجى يه قائل اولانلر اسباب موجب اولوق اوزره ديورلر كه : شافقه كهي شمار كفرى بالا اختيار كييهن كييمه اساساً موحد ، قلباً و صدق اولدينى ايجون مؤمندر .

اجله مجتهدین کرامدن امام اعظم (رحمه الله) حضرت تری دیمشدرکه:
 (بر کیمسه ایمان واسلامدن آنجق کیردیکی قابودن چیقار) مشارایه
 حضرت تری نک یوقولنه نظراً ایمانه اصالة دخول آنجق اقرار و تصدیق ایله
 اولور. چونکه ایمانک رکئی بونلردن عبارتدر. شایقه کییهن کیمسه ده
 ایسه اقرار ایله تصدیق موجوددر.

(جواب)

ایمانک بر طاقم لوازمی وارددرکه آنلرک عدمی ایله ایمانک ضدی
 اولان کفر تحقق ایدر. مثلاً الله تعالی، انبیای کرامه، کتب الهیه
 تعظیم، لوازم ایماندندر. بونلری استخفاف ایسه تعظیمه منافی اولدینی
 ایچون کفردر. بناءً علیه منافی تعظیم و اماره تکذیب اولان اقوال
 و افعال شرعاً موجب کفر عدولنمشدر. اساساً شرع شریف نظرند
 علامت تکذیب و اماره انکاره مقرون اولان تصدیق و اقرار معتبر
 و معتدیه دکلدیر.

شو حالده امام مشارایه حضرت تری نک قولینک منافی ایمانک شرعاً
 معتبر اولان رکیزلریته منافی بر قول و یا بر فعل بر مسلمدن صدور
 ایتمک، کافر اماراز دیمکدر. نه کیم بوتیه سجده ایتمک؛ الله تعالی، انبیای
 کرامی، کتب الهیه، شرع شریفی تحقیر و استخفاف ایلمک کی منافی
 ایمان اولان برایش ایشله مک و یا بر سوز سویله مک علامت تکذیب و اماره
 انکار اولدینی ایچون مرتکبینک کفری ایله حکم اولنور. فتاوی هندیه
 و محیط برهانی ده دینیلیورکه (باشنه قنسوه مجوسیه یعنی مجوسی شایقه سی

کیهن کیمسه نك کفرینه قائل اولانلرک قولی صحیحدر .
 بوقوله ذاهب اولانلره کوره سوء عقیده دن نشأت ایلدیکی ایچون
 قانسووه مجوسیه بی کیهن کیمسه نك کفریله حکم اولنور . نته کیم
 (بن مجوسیم) دیهن کیمسه نك بوسوزی سوء عقیده سی تصریح
 اولدینی ایچون کفری ایله حکم اولمشدر .
 چونکه مجوسیلره مخصوص و آنلرک شعاری اولان قانسووه بی
 بالاخیار کینیمک کیه نك روحاً مجوسیت معنویتیه صیغه لشم اولدیغنه علامت
 و اماره در . آنک ایچون بو قیافتده کورولنلرک کفری ایله حکم
 اولنور .

شونی ده عرض ایده یمکه بتون ملتلك باش کسوه لری ملیت و دینلریله
 برنوع علاقیه بی حازدر . شاپه لر ، سرپوشلر مثلاً آوروپا ملکتلرنده
 نه قدر مختلف اشکاله آریلورسه آریلسون هپسینک بر اصلدن تنوع
 ایلش اولدینی وزمان ، مکان اعتباریله اختلاف ایتمکه برابر اواصلک
 روحی محافظه ایلمکده بولندینی شبهه سزدر . شو حالده شاپه دین
 و ملیت علائمی اولدینی ایچون اونی کیهن کیمسه (بن بو ملتدن ایم)
 دیه بر اقرار یامش اولور . مقابلنده صراحت بولنان بوکی دلائلر
 ایسه هر حالده صریح کی معتبردر . آنجی مقابلنده فعلاً صراحت
 ایمانی کوسترن احوال و اعمال قارشوشنده بو اقرار حکمدن ساقط
 اوله ییلیرسه ده مسلمانلر نظرنده او آدم کندیسنی شبهه دن قورتاره من .
 بومسئه شاپه بی کیمکه سائی ، قلبی و روحی اولدینی تقدیرده در .
 سائی ، قلبی اولورسه ایمانی کوسترن احوال و اعمال ریا و نفاق
 و او آدمک ده صرائی و منافق اولدیغنه حکم اولنور .

اساساً شعارلرنده غير مسلملره تشبهدن منع ونهی ايله شارعك مراد ومقصودی بین المسلمین ملیت اسلامیة تاسیس ایلکدر . ملیت اسلامیة نك مداری ده ملیت کفره مخصوص اولان شعارده وعادات واطوارده کفاردن آریلوب آنلره بکزه مه مکدر . بناء علیه ملیت اسلامیة ده غیرت کوستمک و اظهار هلاکت ایتک شعار ایماندندره . آنک ایچون هر مسلمان ، احکام دینییه مغایر ویاخاصه ملیت اسلامییه مخالف اولان امورون اجتناب اتملیدر .

شوحالده لساناً اقرار ویدناً عبادت وعمل کبی ملیت اسلامیة نك علام ظاهر سیله اصلاً علاقه دارلق کوستمیوب زی ویاقتدن بشقه غیر مسلملردن فرقی قالمش اولانلر قیافتلری ده آنلره بکزه دیورینجه باطنلرنده کی ایمانی تمثیل ایده جک و ملیت اسلامییه کی کوستره جک هیچ برحالی قالمدینی ایچون (من تشبه یقوم فهو منهم) حدیث شریفنک مقتضای منیفهجه او آدمک زمره کفریه التحاق ایتش اولدقلرینه صورت قطعیه ده حکم اولونور . بو حقیقی توضیح ایچون بر مثال ایراد ایتک ایسترم : هر دولتک علامت مخصوصه یی حائز بر نوع بایراغی واردرک او بایراغ هانکی واپورک ، زرهلینک ، طیاره نك ، مکتبک ، بنانک اوزرنده بولنورسه او دولتک اولدیغنه حکم اولنور . مثلاً بزم یاووز زرهلیسی بتون مشتملاق اعتباریله ، انکلز ، فرانسر آلمان زرهلیرینه بکزه دیکی حالده یالکزه شانلی بایراغنک علامت فارقه سیله آنلردن امتیاز ایدر . بو علامتی کورنلر بزم زرهلیمز اولدیغنه حکم ایدرلر . بشقه دولتک بایراغنک بزم زرهلییه چکیلمه سی سیاه صرفاً ، عادة وقانوناً ممنوعدر . آنک ایچون بونک مرتکبی خیانت

وطنیه، جنایت ملیه واجبی طرفدارانی جریمه اتهام ایدیه‌لرک اعدامنه حکم اولنور . بوتک ایچون دول متصدنه دن هیچ بریستک بایراغنی بزم واپورلره ، زره‌لیلره چکمه‌ک صورتیه آنلره تقلید وتشبهه یاتمه‌مکه هیچ بر کیسه جسامت کوستره مز .

ایشته بوتک کبی (من تشبهه بغیرنا فلیس منا) حدیث شریفیه مسلمانلرک ، شعار و علامت کفرده غیر مسلملره بکزه‌مکه یلتملری منع اولنمشدر . بناء علیه بزم زره‌لی ده بشقه دولترک بایراغنی کورنلر اوزره‌لینک بزم اولدیغنه حکم ایده‌جکری کبی شایقه ، صلیب وسائر شعار کفری کیهن و طاقانلرک ده ملیت اسلامیه دن چیقوب زمره کفرده اتحاق ایتیش اولدقلرینه حکم ایدرلر .

فقه‌ای کرام حضراتی قانسونه مجوسییه کیهن گیمه‌سهنک کفرینی تصریح ایلدکری حالده قانسونه یهوددن بحث ایتیمورلر . بوتلری کیینمک موجب کفر دکلر دیریه سوال اولنورسه جواب اولق اوزره دیرزکه : شرع شریف نظرنده کفر، ملت واحده عداولندیغی ایچون علامات کفر ییتنده فرق یوقدر .

بناء علیه عناصر غیر مسلمنه دن هر هانکیسی اولورسه اولسون آنلرک شعاری اولان شیلری کیینمق ، طاقینمق ، قوشانمق قول مجیهده کوره کفردر . (من تشبهه بغیرنا فلیس) «نالا تشبهوا بالیهود والابنصارى» حدیث شریفی ملل غیر مسلمیه یه مخصوص اولان شعار و علامت ییتنده شرعاً فرق اولدیغنه دلیل برهاندر .

شایقه ، زنار ، صلیب کبی شعار کفردن معدود اولان شیلری اکتسا وانخاذا ایدینه‌مکه شرعاً مأمور به اولان شیلری ، («نالا نمازی»

زکاتی (ترك ومنهی عنه اولان شیلری (مثلاً زنا، سرقتی) ارتکاب
بیننده فرق نهدرکه اولکیلر علامت کفر واماره تکذیب عداولندی
حالده ایکنجیلر عدا اولنور دیه بر سؤال ایراد اولنه جق اولورسه
جوابنده دیرزکه :

واقعا ایکنجیلرده اولکیلر کبی شرعاً ممنوع ایسه ده هوسات و شهوات
نفسانیه بونلری ایشلمکه فطرة سائق آتک ایچون قوه شهویه لری
عقللرینه غالب اولان زمره بشر دیناً ممنوع اولان مشتهیات نفسانیه
ارتکابدن خالی قالماز. ایشته بونک ایچون شارع اونلری اماره تکذیب
عدایتمه مشدر. فقط اهل کفره مخصوص اولان شمار وعلامتی ارتکاب
ایچون بویه بر عذر و فطری بر سائق یوقدر. زیرا بواساساً نفسک
آرزو و میل ایلدیکی مشتهیات جمله سندن دکلدر. شو حالده بونی ارتکابه
سائق سو عقیده دن باشقه برشی اولمدی ایچون شرع شریف ممنوعات
شرعیه نک بوقسمی علامت کفر واماره انکار عدایله مرتکبک کفرینه
حکم ایتمشدر .

فقهای کرام حضراتی (بر مسئله ده طقوس احتمال، کفره
و بر احتمال ده عدم کفره اولورسه عدم کفر جهتی ترجیح اولنق
صورتیه فتوا ویرمک اقتضا ایدر. زیرا کفر جنایت عظیمه اولدیغندن
عدم کفره بر احتمال وار ایکن تکفیر جهته کیدمک موافق اولماز)
دیورلر. شو حالده بوکا نظراً شمار کفری ارتکاب ایدنلر فصل
تکفر اولنه بیلیر دیه سؤال اولورسه چوایده دیرزکه : فقهای کرام
حضراتک بر سوزلری مسئله ده عدم کفره احتمال بولندیغه کوره در :
بویه بر احتمال بولندیقی قدیرده بالاجماع کفر ایله فتوا ویرمک ایجاب

ایدر . بونکله برابر فقهانک بو سوزلری نفس الامر دکل ، احتیاطه
 مبتنی در . مسئله ایمان و کفره متعلق اولدیغین غایت مهمدر . آنک
 ایچون بر مسئلهده کفره طقسان طقوزدکل ، حتی بر احتمال بیله اولسه
 عقلی باشنده بر مسلم بویله مخاطره لی شیشه مجاسرت ایتمه ملیدر . زیرا
 او بر احتمال نفس الامرده موجب کفر اوله بیلیر . مسلمان ایچون
 الک معتبر و الک قیمتمدار اولان ایمان و اسلام مسئله لرنده شائبه کفر اوله بیله جک
 شیلردن صاقینملریخی اخوان دینه توصیه ایدر و (اعملوا فسیر علی الله
 عملکم = دیله دیکیزی ایشله ییکیز . الله عملکیزی گوریور ، نظم
 کریمک مضمون عالیسنه اخوان دینک نظر دقتی جلب ایلرم (فاعتبروا
 یا اولی الابصار) والسلام علی من اتبع الهدی
 الحمد لله رب العالمین والصلاة والسلام علی سید المرسلین وعلی اله
 واصحابه اجمعین فی کل وقت وحين آمین .

۱۰ ذی الحجة سنه ۱۳۴۲ ، ۱۲ تموز سنه ۳۴۰



